

DE
NEGATA MEDICORVM
RESVRRECTIONE

AD ESA. XXVI, 14

IN PROGR. PASCHAL.

PAVCA DISSERIT

D. CAROLVS GOTTLOB
HOFMANNVS

S. S. THEOL. PROF. PVBL. ORD. CONSIST. ECCL.

ASSES. AED. MAR. PAST. DIOEC. VITEMB.

ET TOT. CIRC. SAX. SVPERINT. GENERAL.

H. T. FACVLTAT. THEOL.

DECANVS

VITEMB. D. XXV. MART. M DCC XLII.

APVD EPHRAIM GOTTLOB EICHSFELDIVM
ACAD. TYPOGR.

THE
JOURNAL OF THE
ROYAL MEDICAL SOCIETY

IN 1900

OF THE

58700 (22)





B. c. D.



Quam omnes naso suspendunt adunco,
 mordacique sibilo confectantur pagani,
 de futura mortuorum resurrectione,
 doctrinam: Quam cum CAECILIO (a) apud MINVT. FELIC. in O-
 ctav. p. 335.
 anilibus fabulis atque mendaciis, pueri-
 libus deliramentis cum PLINIO, vaniloquentiae cum PLINIVS L. II. nat. hist. c. 7. & L.VII.
 Atheniensibus philosophis, annumerant profani: Quam c. 55.
 omnis Atheorum & Naturalistarum turba furiosa, vt Actor. XVII,

A 2

metum

32.

(a) Quia CAECILIUS omnia fere a paganis, in doctrinam de mortuorum resurrectione, vituperia prolata, vno quasi impetu, eruat, non possum, quin verba, etsi prolixiora, huc repetam: Nec hac furiosa opinione contenti, omnes fabulas adstruunt & annectunt. Renasci se ferunt post mortem, & cineres & favillas: & nescio quae fiducia mendaciis suis invicem credunt, putes eos iam revixisse. Anceps malum & gemina dementia. Coelo & Astris quae sic relinquitur, vt invenimus. interitum denunciare: sibi mortuis & extinctis, qui sicut nascimur & interimus, aeternitatem repromittere. Inde videlicet & execrantur rogos, & damnant ignium sepulturas; quasi non omne corpus, etsi flammis subtrahatur, annis tamen & aetate in terram resoluatur: nec intersit, utrum ferae diripiant, an maria consumant: an humus tegat, an flamma subducat: cum cadaueribus omnis sepultura, si sentiunt, poena sit: si non sentiunt, ipsa conficiendi celeritate, medicina. Hoc errore decepti, beatam sibi, vt bonis,

metum horrendissimarum corporis post mortem poenarum excutiat, explosam proscriptamque cupit: Nos rectiora, meliora, atque certiora edocti tanto maiori accipimus animi, ad hoc saeculum non nati, cupiditate, optime gnari, de cinerum & fauillarum hominis restitutione doctrinam esse Christianorum propriam, & eam solatii pariter & terroris plenissimam, inque una diuinorum oraculorum auctoritate fundatam. (b)

Ter-

bonis, & perpetem vitam mortuis pollicentur: caeteris, ut iniustis, poenam sempiternam. In promptu sunt longe plura paganorum scommata, diligenter passim a viris eruditis conquisita: Nos autem vnum hoc e TERTULLIANO Libr. adu. haeret. c. VII. p. m. 203. edit. Pamel. addimus: *Et ut carnis restitutio negetur, de vna OMNIUM PHILOSOPHORVM schola sumitur.* Tanto maiori industria primi religionis Christianae Apologetae, resurrectionem certe futuram, asseruerunt, longo ordine citati & laudati a b. Io. ALB. FABRICIO in delect. & syllab. argumentor. pro V. R. C. cap. 45. p. 706.

(b) Pulcrum nuper vidimus spectaculum, quod munerarius nescio quis Hamburgi edidit, non adeo magno *Begehr* proposito, ubi eruditissimos maximam partem viros vidimus certantes de palma, doctrinam de resurrectione mortuorum omnium optime confirmaturo promissa, & ab agonotheis prudenter admodum electis distribuenda. Utinam, hanc in arenam nemo, nisi satis expertae virtutis, gladiator descendisset, ne infirmo latere pugnans, iustae causae magis noceret, quam posset eidem prodesse. Vidimus enim quendam, non sine multa indignatione, a sola resurrectionis possibilitate ad probabilitatem temerario ausu concludentem, quod profecto nihil aliud est, quam religionem exponere risui Atheorum. Accipe verba ipsa: *Ist die Auferstehung der Todten möglich, wie wir verhoffentlich zur Gnüge bewiesen haben; so wird sie unstreitig auch glaublich seyn müssen.* Proba, bone vir: probat, denn dasjenige pflegt man mit größtem Recht glaublich zu nennen, was an sich nicht eben vollkommen klar; aber doch möglich ist. Hoc, si idem per idem probare non est, quid tandem est. Scilicet, possibile (sit venia verbo) est probabile, eccur? quia omne probabile est possibile. Optassemus certe, ut, quotquot certamen istud iniere, doctissimi Io. PEARSONII, Episcopi Cestriensis, *expositionem symboli Apostolici huiusque articulum XI.* p. m. 655. sequ. legissent; ubi *primo*, resurrectionem carnis haud impossibi-

lem

Terroris plenissimam, diximus doctrinam de reuocandis in vitam sepultis cadaueribus, quippe ad quam contremiscunt, quotquot mens malorum facinorumque conscia angit, diu quidem, sed frustra, in id nitentes, vt SENECAE effatum

Post mortem nihil est, ipsaque mors nihil,

si qua verisimilitudinis specie fieri posset, vel confirmet, vel, a veritate adeo non abhorrere, sibi persuadeant: Sed, quia impii peccata in corporibus contraxerunt, iudice LACTANTIO, rursus carne induentur, vt in corporibus piaculum soluant. Surgent impii, τα Φαυλα πραξαντες, εις αναστασιν κρισεως, in resurrectionem condemnationis, hoc est, quam damnatio aeterna indiuulso nexu excipiet, & quae ideo, vt ad inferos corpus in vitam reuocatum detrudatur, futura est. Ad aeternam ignominiam magna pars illorum euigilabit, quos terra nunc tegit, olim vero diuina potentia fuscitabit. Non soli ευλογημενοι τῃ Πατρὶ, qui blandissima ouium appellatione veniunt, sed & τα ερι-
Φια εξ ευωνυμων stabunt coram iudice. IESV, vt dignam operibus mercedem accipiant. Reiicimus itaque

Libr. VII. in-
stit. c. 21.
Ioh. V, 29.

Dan. XII, 2.

Matth. XXV,
32. seqq.

A 3

cum

Iem esse in se ipsa, *secundo*, ob generales propositiones & rationes, a rebus intra & extra nos obuiis petitas, esse quam probabilissimam, *tertio*, e principiis Christianis infallibiliter veram, egregie doctissimeque docuit. Cui si IO. GERHARDVM, stupenda plane opera ad confirmationem doctrinae de resurrectione mortuorum, omnia conquirentem, *Loc. Theol. tom. VIII. a p. 970. ad p. 1094.* iunxissent, omnino intellexissent, nihil fere dici ardua hac in causa posse, quod dictum olim non sit. Sed omnibus rationibus probe ponderatis, tandem GERHARDVS pronunciat §. 41: *Sed haec omnia nondum a nobis impetrare possunt, vt statuamus, resurrectionem mortuorum esse vel natura notam, vel philosophicis rationibus apodictice demonstrari posse.* Paucis interiectis: *Allata argumenta esse topica, non apodictica, verisimilia, non cogentia, quippe quae multis labefactari possunt instantiis contrariis.*

cum Iudaeorum, tum Photinianorum recentiorum (c), de impiorum resurrectione non futura, commenta impia, serioque detestamur dicaculorum quorundam insana prorsus dicta, dum, ut nostram de resurrectione doctrinam fidemque vel risui exponant, vel cum ea iocentur tempus fallendi gratia, (serio enim eos rem agere, vix ac ne vix quidem credimus) ad Esa. XXVI, 14. graecamque huius vaticinii versionem prouocant:

Οὐ δὲ ΙΑΤΡΟΙ & μὴ ἀναστήσῃσι,

quae

(c) De Iudaeis constat inter omnes, resurrectionem impiorum ab his prae fracte negari, iustorum tantum affirmari. Multo studio, ut solet, loca Rabbinorum congerit Philologus celeberrimus; olim noster, THEOD. DASSOVIVS, in erudito libello, *de Iudaeorum sententia de resurrectione mortuorum*, cap. IV. §. 2. cui, si placet, iungi potest ΠΟCOKIVS in *porta Moſis*, p. 147. & HORNBECKIVS de *conuinc. iudaeis*, Libr. 8. c. 4. Obseruasse iuuabit, Iudaeos ex eo, quem nunc in primis tractamus, loco Esaiae cap. XXVI, 14. rationes pro neganda impiorum resurrectione, petere, quas b. DASSOVIVS cap. V. §. I. p. 129. loc. cit. p. 129. & allegat & confutat.

De Socinianis, credantne resurrectionem impiorum, lis est sub iudice. Tribuunt hunc errorem Socini asseclis MARESIVS hydr. Secin. exp. Tom. II. Libr. III. cap. 33. p. 315. SCHERZERVUS colleg. antisocin. disp. 147. p. m. 1260. aliique longe plures. Sed ipse SCHERZERVUS fatetur l. c. *Impios esse resurrecturos, nemo, quod sciamus, saltim hodie, inter Socinianos PALAM negare videtur. Interim Socinus hic TECTE egit, & sententiam suam, quantum potuit, occultauit.*

Meminit ORIGENES comment. in Psalm. I, 3. fragm. fuisse olim & inter Christianos, qui malos resurrectionis compotes futuros negabant: Ἐντεῦθεν οἱ ἀπλῆστεροι τῶν πεπιστευκοτῶν ὁρμῶμενοι νομίζουσι τὰς ἀπεβίαις τῆς ἀναστάσεως μὴ τεύχεσθαι, καὶ τῆς θείας κρίσεως μὴ καταξίσεσθαι. id est, interprete DION. PETAVIO: *Huius loci auctoritate freti simpliciores quidam ex fidelibus negant, malos Resurrectionis compotes futuros, aut Dei iudicio dignandos.* vid. Opp. tom. II. p. 42. edit. Huetian. Et reapse hanc multorum fuisse opinionem tunc temporis, peruersae Psalmi I, 5. interpretationes, a SVICERO diligentissime collectae, testantur, in *thesaur. ecclesiast.* tom. I. p. m. 359. 360.

quae verba b. AVG. PFEIFFERVS, literarum graeca-
rum caeteroquin haud expers, reddidit: in dubiis ve-
xat. p. 701.

Nec MEDICI ullo modo resurgent.

Quo sensu eadem verba accepit Arabs interpres, te-
ste BRIANO WALTONO: sed Chaldaeus loco ME- in Bibl. Poly-
glott. tom. III.
ad h. l.
DICORVM nominat גִּבְרִיּוֹן gigantes, viros fortes,
habetque Syrum consentientem, & Latinum cum
HIERONYMO. Cui iungere licebit, ex Ps. LXXXVIII,
II. similem Graecae Versionis errorem,

Μη ΙΑΤΡΟΙ ανασησασι και εξομολογησονται σοι;
quem Vulgata partem seruauit, partem emendauit:

*Num MEDICI suscitabunt, & confitebuntur
tibi?*

Arabs autem, eodem WALTONO teste, in locum
MEDICORVM substituit PHILOSOPHOS, hosque
resurrecturos negauit. Alia omnia in utroque loco
loquitur Ebraeus codex, quippe qui neque MEDICO-
RVM, neque PHILOSOPHORVM meminit, neque
horum resurrectionis futurae. Scilicet vox sacri

Textus רפאים difficilis intellectu, errandi occasionem
praebuisse videtur septuaginta illis Alexandrinis, ebrae-
arum literarum non satis vbique peritis, qui, cum
nescirent, quid *Rephaim* significarent, signa vocalium
mutantes רפאים legebant, inque MEDICOS ver-
tebant.

Iam pridem eruditi viri intellexere, Ale-
xandrinis vel menda codicum suorum retinuisse pas-
sim, vel, quia codices punctis instructi non erant, affi-
nia non satis distinxisse, fictas veris lectiones antetulif-
se, literisque sonantibus puncta ex ingenio subscri-
psisse: id quod postremum eos in voce רפאים fecif-
se, ocularis inspectio docet. Retinuerunt signa sonan-

Conf. CARP-
ZOVII critic.
sacr. V. T. p.
516. HOT-
TINGERI
thes. philol.
L. I. c. 3. qu.
15. p. 354.
DRVSII ob-
seru. L. VI. c.
9. & alii per-
quam multi.

tia,

tia, sed vocalia mutarunt, ignorantiae culpa dicam, an ἀβλεψίας vitio, diuini eloquii sensum negligentes. Condocet hanc Alexandrinorum supinam ignorantiam, temerariamque fingendi quidlibet ex quolibet audaciam, vox sequens יקרי, quam ἀνασησσι reddunt, manifesto errore, propter aliqualem soni similitudinem יקרי cum יקרי confundentes. Nec mirari satis potuimus, qui fuerit factum, ut b. PFEIFERVS graecum ἀνασησσι verteret *resurgent*, cum actiuam significationem clarissime inuoluat, *suscitabunt*, nec το ἀΝΑΣΤΗΣΟΝΤΑΙ apud Alexandrinos legatur. Vtut enim verbum ἀνισημι suos χρόνος αορις, nunc neutro, nunc transitiuo sensu accipiendos flectat, nunquam tamen τον μελλοντα alio, quam actionem designanti. Sed errare humanum est, in primis in rebus leuioribus, ad quas raro attendimus, grauiora sectantes. Maiori accurate verba Alexandrinorum transtulit WALTONVS: *neque medici ullo modo suscitabunt.*

Quam turpem errorem (d) commiserint Alexandrini hac sua versione, duobus potissimum argumentis

- (d) Qui fuerit factum, ut Alexandrini in praeclarum & de humano genere optime meritum MEDICORVM ordinem videantur iniquiores, coniectando ne quidem assequimur, nisi quod forte odio in medicos, Iudaeis olim proprio, quippiam eos dedisse, suspicemur. Quae enim apud Buxtorfium Lexic. Talmud. f. 153. & alibi passim, leguntur vituperia in Medicos, peiora sunt, quam ut sine offensione bonorum repeti queant. Nec defuerunt nostra aetate, qui cultores artis medendi variis calumniis vexarunt. Ne quid dicam *de medico Romano seruo sexaginta solidis aestimato*, nuper Lipsiae recuso A. MDCCXLI. cuius dicac auctorem ferunt Io. FRID. BOECKELMANNVM, Ictum Heidelbergensem, posthac Leidensem, dicamus, de quo IUL. CAR. SCHLAEGERI historia litis, *de Medicorum apud Romanos degentium conditione*, plura edisseruit p. 17. Exilium illud Romanum false Medicis obicitur, quam iniuriam tamen a suo ordine depulit CAR. DRELINCVRTIVS, in *apologia medica*, qua vetus illa confu-

mentis freti, sed breui, monstrabimus. Totum caput sextum & vigesimum Esaiæ, canticum, quod felicem atque securum ecclesiæ noui foederis statum celebrat, nobis exhibet, ita vero, vt loquendi formulae a populo Iudæo, in libertatem vindicato, olim adhibitæ, ad decantandam N. T. libertatem atque securitatem, in eo transferantur. (e) Etenim vates loquitur cap. XXV, 6. de coena omnibus terræ incolis, non solis Iudæis, apparanda, v. 7. de tollendo Iudæos inter & reliquos populos discrimine, v. 8. de reditu Iudæorum ad verum Dei cultum, v. 9. de certa temporis periodo, in qua summus IEHOVA vbique, non in Palæstina vna, agnoscetur atque adorabitur, cap. xxv. i. seq. de Zione nunquam superanda, vtut impii quouis modo, qualis arte, omni robore & vi, vt eam superent aratrumque ei imponant, sint experturi. Felicissimus ille sacrarum paginarum interpres, CAMPEGIVS VITRINGA, (cuius eruditissimas in Esaiæ vaticinia commentationes plagiarii bene multi, & inter hos viri etiam non infimi ordinis, in suos vsus transferre solent, IAC. THOMASII de plagio literario dissertationem olim aucturi) de illo tempore, in quo

B

Pro-

confutatur calumnia, medicos sexcentis annis Roma exulasse, Lugd. Batav. a. 1671. 12mo. nec non eruditissimus Londinensis Medicus, RICHARDVS MEAD, in *oratione Harueiana* an. 1723. Londini in Theatro regii medicorum Londinensium collegii habita, quam aeneis typis exscriptam, nemo sine summa animi voluptate perleget: Adiecta est dissertatio *de nummis quibusdam a Smyrnaeis in Medicorum honorem percussis*, quæ veterum Medicorum honores egregie vindicat, vtut CON. MIDDLETON, academia Cantabrigiæ Protobibliothecarius, iterum iterumque MEADO doctissimo contradixerit.

(e) Egregie hanc regulam, in Prophetarum V. T. scriptis probe obseruandam; exposuit GLASSIVS in philolog. sacr. L. I. tract. 4. Sect. I. can. 5. p. m. 319. & Libr. V. Tract. I. cap. 13. p. m. 1885. nec non CAMPEG. VITRINGA in præfat. ad comment. in Esa. f. XIV.

Protestantium ecclesia, deletis suis persecutoribus, fedem stabilem nacta est, vatem praecise loqui autumat. Quod etsi nostrum non facimus, certissimum est, non de vltima mundi huius exustione, non de securitate coelesti illa secutura, non de resurrectione mortuorum proprie sic dicta, multo minus de regno Chiliastico, quod *Halenses bibliorum germanicorum editores* (f) somniant, sed de stabilitate atque perennitate ecclesiae Christianae, a tyrannis quidem afflictæ, sed in libertatem nunc vindicatae, loqui prophetam. Haec nos mouent, vt ebraeum יָקֻם, vel in sensu compositi de *resurrectione* improprie tali (g), hoc est, de tyrannorum restitutione nunquam futura, vel in sensu simplici *stare*, quo, persecutores ecclesiae mansuros fore, negatur, accipiendum putemus. Eximium robur nostrae sententiæ addunt verba proxime sequentia: לָכֵן פָּקַדָהּ וַתִּשְׁמַדֶּם וַתַּעֲבֹד כָּל-זָכָר לָמוֹ quae SEB. SCHMIDIVS rectissime vertit: *eo quod visitasti & extinxisti eos, & perdidisti omnem memoriam illis.*

DANZII interpr. ebr. chald. p. 354.

Medicorum ne nomen quidem ab Esaia vate afferri, vox ebræa cum genuinis punctis vocalibus pronunciata רַפָּאִים, aperte docet, quippe quam Alexandrini, iudice DANZIO, ridiculo errore, cum רַפָּאִים confuderunt, grauiorem censuram promeriti. Discrepant de genuina רַפָּאִים significatione sententiae auctorum, siquidem *manes* ARIAS MONTANVS, *gigantes* CHALDAEVS, SYRVS & VVLGATA, מוֹר-

(f) Nam in editione bibliorum Halensi, interpretationis ergo, citatur locus quasi parallelus, Apoc. XX, 5. id quod manifesto est indicio, cogitasse editores illos, ad hunc nostrum Esaiae locum, de regno suo Chiliastico, vel potius Vtopico.

(g) Io. BRENTIVS in comment. ad h. l. asserit, hebraeos legere, *deficiunt*, non, *resurgent*.

mortuos LVTHERVVS, SANTES PAGNINVS, VITRINGA, aliique, reddunt, (b) magnus vero SEB. SCHMIDIVS ipsam Ebraeam vocem *Rephaim* retinet, quod est indicio, praestantissimum virum de vera significatione vocis vel dubitasse, vel id pro gentilitio habuisse. Quod ad nos, est in Esaiiae volumine locus satis clarus, quo freti *Rephaim gigantes*, populos fortissimos, & eos quidem hostiles, in DEI populum crudelissime grassantes, intelligendos esse, tuti affirmamus. Sic enim verba fluunt: *Excitavit propter te Rephaim, omnes arietes potentes terrae, surgere fecit de thronis omnes Reges gentium.* VITRINGA de vmbris mortuorum, quas HOMERVVS ψυχας, εἰδωλα καμοντων dixit, ad hunc locum cogitat, quasi ad gentilium fabulas alluderet Esaias: malumus autem nomen gentilium, quod Cananitarum populum fortissimum, statura eminentem, verbo, *gigantes* denotat, per elegantem translationem, ad ferocem quemlibet populum, DEI populo maxime infensum, transferre. v. Gen. XIV, 5. c. XV, 20. Deuter. III, II. cap. II, II. 20. (i) Consistentem habemus summum Theologum, IO. GERHARDVM, qui per רפאים oppressores & persecutores ecclesiae intelligit, non surrecturos vel victuros, id est, ad potenti-

Esai. XIV, 9.

VITRINGAE
Tom. I. comment. in Esaiam p. 433.

GERHARDI
Loc. Theolog.
tom. IX. p. m.
1080.

(b) Placet MATTH. HILLERI sententiam in Onomast. sacr. p. 102. prolatam huc transcribere: *Rephaim, i. e. mortui, manibus defunctis longitudine pares, humana specie maiores, a verbo רפא, quod affine themati רפא, remissum vel porrectum esse. Rephaim est Gigantum nomen, Gen. 14, 5. Deut. 2, II. Adde, quae ab eodem HILLERO l. c. p. 285. de hoc nostro Esaiiae vaticinio, & p. 287. de appellationis causa, prolixius disputantur.*

(i) De *Rephaim* sedibus antiquis, videatur HADR. RELANDVS in excellentissimo de *Palaestina* opere p. 141. Sed de *Gigantibus*, extiterintne olim & ubi, lectu dignissima est AVG. CALMETI dissertatio, quam in *dissertationibus s. prolegomenis in S. Scripturam*, tom. II. p. 353. edit. latin. obuiare constat.

tentiam, quam olim tyrannorum more exercuere in Iudaeos, non aspiraturos, a ruina non eluctaturos. (k)

His ita disputatis, neque MEDICORVM, neque impiorum, multo minus omnium mortuorum, resurrectionem ab Esaia negari, satis constabit.

Tu vero, PRAEPOTE NS NVMEN, cuius ad imperium pulvis olim commouebitur, ossaque carne sua iterum vestientur! Confirma fiduciam, quam in futura nostra resurrectione ponimus, TV AMQUE nobis largire gratiam, vt vitam his in terris geramus futuro saeculo dignam, olim cum IESV ΠΡΟΤΟΤΟΚΩΙ ΕΚ ΤΩΝ ΝΕΚΡΩΝ in vitam redituri. Tunc enim, PATER, filius tuus nostra sepulcra aperiet, suaeque nos manu e puluere suscitabit, hunc in finem ipse tertio die e monumento suscitatus, vt mortuorum pariter & uiuorum sit REX & DOMINVS. Hanc ipsam CHRISTI resurrectionem, hodie grata mente & manu ad aram accessuri, nobiscum vt celebretis, CIVES OPTIMI, est, quod peramanter atque officiose rogamus.

(k) Eandem nobiscum sententiam tuetur b. GVST. GEORG. ZELTNERVS in bibl. an. M DCCXL. diuulgatis, ad h. l. p. m. 896. *Die gewaltigen Regenten, auch unter denen Heyden, welche die Kirche Christi lange verfolget, &c.* Quodammodo HVG O GROTIVS nobiscum facit: *Gigantes non resurgent, i. e. Tyranni isti non redibunt ad nos vexandos.* Nec procul a nobis discedit SEB. SCHMIDII interpretatio: *Putamus ecclesiam DEO proponere veterem ipsius erga impios tyrannos vindictam, quos morti ita tradiderit, vt nocere amplius nequeant, imo eorum omnis memoria laudis exstincta sit.* comment. in Esa. p. 226.

